



**Umiarsuarmik ilaasartaammik sinersortaammik Nanortalimmiit Upernavimmut angalasoqarsinnaasunngorlugu 2020-miit ataatsimik umiarsualiisoqaqqinnissaanik sulissuteqaqqullugit Naalakkersuisut peqqunneqarnissaannik Inatsisartut aalajangiiffigisassaattut siunnersuut.**

**(Inatsisartunut ilaasortaq Aqqalu C. Jerimiassen, Atassut)**

Allakkatigut oqarasuaatikkuullu attaveqatigiissinnaaneq ullumikkut pinngitsoorneqarsinnaanngilaq, soorluttaq aamma messengerikkut, facetimekkut, facebookikkullu attaveqatigiissinnaaneq ullumikkut aamma pinngitsoorneqarsinnaanngitsoq ilisimalereersimagipput.

Nunarsuarmi sumiikkaluaruttaluunniit messenger, facetime aammalu facebook aqqutigalugit immitsinnut attaveqatigiissinnaalernikuuvugut: Messenger aamma facetime aqqutigalugit immitsinnut qanilligaluttuinnarpugut, taakkulu aamma aqqutigalugit nunarsuarpullusooq milligaluttuinnartutut ippoq.

Nutaarsiassat sulluunniit messengerikkut facetimekkullu pissarsiarisinnaanngisagut umiarsukkoorlugit, timmisartukkoorlugit imaluunniit aqqusinikkooorlugit pissarsiarisinnaasarpagut.

Naatsumik oqaatigalugu; inuiaat kikkulluunniit pitsaasunik peqqinnartumillu inuttut, inuiattullu ineriartoqqissinnaassagunik, taava attaveqaatigut angallannerullu tungaatigut pitsaasunik atugassaqartinneqartinneqarnissaat avaqqunneqarsinnaanngilaq. Tamanna toqqammaviulluinaqqissaarpoq, pinngitsoorneqarsinnaanilu.

Allakkatiguuppat, oqarasuaatikkooorpat, facetimekkooorpat, umiarsuartigoorpat, timmisartukkoorpat, aqqusinersuartigoopalluunniit. Tamarmik immikkut pingaaruteqarput, tamarmik immikkoooruteqarput, tamarmillu pinngitsoorneqarsinnaanngillat.

Unnialumi pitsaanngitsunik attaveqaateqarnerup kingunerisinnaasarai inunnut inuiannullu allanut matoqqatitaaneq, unnialumi matoqqatitaanerup aamma kingunerisinnaasarai soorlu; kiserliorneq, ikinngutaarsinnaannginneq, ilisimaassuseq, inuttut ineriartunngitsoorneq, suleqatissaqannginneq, inuiannut allanut akeqqersimaarneq, inussiarniitsuuneq aallaallumi kamannermik sorsunnermillu naggataani kinguneqarsinnaasarsimalluni.

Ukiuni kingullerni untritilikkaani nunarsuatta ilarujussuani, inuiaat imminnut sorsuttarsimanerat qiviannarsinnaavagut; 17-1800-kunni amerikkami europamilu sorsuuttarsimanerit, minnerunngitsumillu sorsunnersuaq siulleq kingullermi qiviaannarsinnaavagut. Unnia tassa tamakku sorsunnerit pilersinneqartarsimapput attaveqaatit pitsaanngitsut kingunerisaannik.

Attaveqaatinik pitsaasunik pilersitsinerup kingunerisarsimmagut; ilisimasaqarnerulerneq, ikinngutitaarneq, inuttut ineriartorneq, suleqatigiinneq, ikioqatigiinneq, ineriartorneq, nutarterneq, eqqissineq, kiffaanngissuseq, peqqinnerulerneq, ammanerulersitsineq siuariartornerlu.

Taamanna pillugu Aqqaluk C. Jeremiassen tamatsinnut pingaaruteqarluinnartumik siunnersuuteqarsimaneranut qutsavigerusupparput; Aqqaluk C. Jeremiassen qujanaq, siunnersuutit paasilluarparput oqaloqataafferusupparpullu.

Nunatsinni attaveqaatit tungaatigut, sukcut tamatigut, pitsanngorsaajuarnissaq ineriartortitsuarnissarlu, Inuit Ataqtiginniit peqataaffigerusupparput suleqataaffigerusupparpullu, pingaartumik avinngarusimasortavut isorliunerusortavullu eqqarsaatigalutigut.

Inoqarfinni avinngarusimasuni isorliunerusunilu attaveqaatit aammalu angallannerup tungaatigut naammaginangilluinnartumik inissisimasoqarnera Inuit Ataqtigiiit nassuerutigissavarput.

Naammaginangilluinnartumillu inissisimasoqarneranik aaqqiissuteqarniarluni iliuuserineqarsinnaasut suulluunniit tamaasa Inuit Ataqtiginniit peqataaffigissavagut oqaloqataaffigissavagullu.

Qanorluunniit mittarfiit maanna sanaartorneqalersut pineqartigaluarpata, piffinnilu pineqartuni iluaqutaatigilissagaluarpata, taamaattoq suli illoqarfippassuaqassaaq angallannerup tungaatigut aaqqiiviginngikkunik ullumikkutut pitsaanngitsigisumik inissisimajuartussanik.

Assersuutigitigineqarsinnaapput illoqarfiit mittarfeqanngitsut, mittarfittaarnissaannillu tigussaasumik suli pilersaaruteqarfineqanngitsut, soorlu Uummannaq, Qeqertarsuaq, Qasiqannguit, Kangaatsiaq, Narsaq, Nanortalik, Tasiilaq & Ittoqqortoormiit.

Illoqarfiit taakku pineqartut ikinnerpaamik 9.000-it missaannik inoqarput. Qaavatigut nunaqarfiit annerit soorlu Kullorsuakktut ittut, 400 missaani innuttaqartut ilanngunneqarsinnaapput.

Tassa inupparujussuit uani pineqarput. Angallannikkullu pitsaanngitsumik atugaqartinneqarnerat isumaqarpoq ineriartornissamut aporfiliinermik illoqarfiit taakku aamma najugarineqarnissaanut orniginarsaataanngitsumik.

Nunaqqaterpassuagut ullumerniit pitsaanerusumik angallannikkut atugaqarnissamik ujartuipput. Uaguttaaq Inuit Ataqtigiiit peqataarusuppugut ujartueqataarusuppugullu.

Aqqaluk C. Jeremiassenip siunnersuutaa soqutigalutigut oqaloqataaffigerusupparput, taamaattumik apeqqutit assigiinngitsut qulaajarneqarsinnaaqullugit ataatsimiititaliamut susassaqtumut ingerlateqqinneqarnissaa Inuit Ataqtiginniit inassuteqaatigaarput.

Qujanaq